



Xistus Augustę natus et educatus est. Ibi cum prima artiũ fundamenta feliciter iecisset, se se ad academiã Basiliensem contulit, & ibidem artibus & linguis operam dedit. In ijs etiam adeo profecit, ut omnium acclamatione 1536 artiũ et philosophiã Magister crearetur. Accedebat & uitã innocẽtia, & in rebus agendis dexteritas. Itaq; ab eius loci magistratu scholæ minoris urbis præfectus, postea etiam in numerum Professorum Academiã cooptatus fuit. Eas functiones is tanta eruditione & diligentia peregit, ut ob uirtutes omnibus doctis innotesceret. In primis uerò in Poësi exercitatus uarias Comœdias, de Iuditha, Susanna,

Iosepho, & alias huiusmodi scripsit, & Basileæ publicè egit. Hoc cum Augustana respub. cognouisset, eum ad se in patriam reuocauit, & liberali stipendio ornatum suæ scholæ præfecit, ut rem literariam iuuaret, & iuuentutem erudiret. Id quod ipse magna laude præstitit, quod uel ipse oculatus testis affirmare ausim, qui anno 1540, adolescens adhuc, ipsum Augustæ magna discipulorum frequẽtia per aliquot menses optimos authores explicantem audiuerim, atq; summa humanitate ab eo susceptus fuerim, donec postea eius opera Mecœnatem Cæsarem Delphinum Physicum & Medicum doctissimum Italum nactus, cum eo Ingolstadium, & inde Viennam Austriæ profectus fuerim. Scripsit Xistus præter Comœdias commẽtarios doctissimos in Ciceronis libros de Officijs, Amicitia & Senectute, Natura Deorum, & alios huiusmodi. Concordantias quoq; sacrarum literarum Græcas collegit, & publicauit. Quin etiam ipse Vuolffgangi Musculi in Græcis literis præceptor extitit, & eius linguæ usum breui docuit. Itaq; factum ut inter doctos uiros magnum sibi nomen compararit. Tandem is anno circiter 1550 multorum desiderio obiit, & in patria honestè sepultus fuit. Con. Gess. Anon.